

Na osnovu člana 19. stav (2) Zakona o Vladi Federacije Bosne i Hercegovine ("Službene novine Federacije BiH", br. 1/94, 8/95, 58/02, 19/03, 2/06 i 8/06) i člana 4. stav (1) alineja 2. i 10. Zakona o kontroli cijena ("Službene novine Federacije BiH", br. 2/95 i 70/08), Vlada Federacije Bosne i Hercegovine, na 214. sjednici - tematskoj sjednici, održanoj 16.03.2020. godine, donosi

ODLUKU O PROPISIVANJU MJERA NEPOSREDNE KONTROLE CIJENA

("Sl. novine FBiH", broj 21/20, od 20.3.2020.)

I.

Ovom odlukom utvrđuje se postojanje uslova za propisivanje mjera neposredne kontrole cijena na području Federacije Bosne i Hercegovine.

II.

Kao mjeru neposredne kontrole cijena iz tačke I. ove odluke, Vlada Federacije Bosne i Hercegovine propisuje za pojedine proizvode zadržavanje cijena na zatečenom nivou, odnosno određenom nivou (zatečene cijene).

III.

Mjere neposredne kontrole iz tačke II. ove odluke odnose se na proizvode u nadležnosti kantona, grada i općine propisane članom 9. Zakona o kontroli cijena, kao i na ostale osnovne životne namirnice i osnovne higijenske potrepštine, koje prodaju privredna društva i druga pravna i fizička lica koja obavljaju trgovinu na veliko i trgovinu na malo.

IV.

Privredna društva i druga pravna i fizička lica koja obavljaju trgovinu na veliko i trgovinu na malo, obavezna su za proizvode navedene u Listi, koja je sastavni dio ove odluke, primjenjivati cijene na nivou zatečenom na dan 5.3.2020. godine.

V.

Vlada Federacije Bosne i Hercegovine će u roku od 15 dana od dana stupanja na snagu ove odluke obavijestiti Parlament Federacije Bosne i Hercegovine o mjerama neposredne kontrole.

VI.

Za realizaciju i nadzor nad provođenjem ove odluke zadužuju se federalna, kantonalna, gradska i općinska tržišna inspekcija.

VII.

Ova odluka stupa na snagu danom donošenja i ista će se objaviti u "Službenim novinama Federacije BiH".

VIII.

Ova odluka će biti objavljena putem printanih i elektronskih sredstava informisanja.

LISTA PROIZVODA NA KOJE SE PRIMJENJUJE MJERA NEPOSREDNE KONTROLE CIJENA

- sve vrste brašna, sve vrste hljeba, peciva i drugih pekarskih proizvoda od brašna i žitarica,
- mlijeko i mliječne prerađevine,
- jaja i proizvodi od jaja,
- šećer,
- so za ljudsku prehranu,
- riža,
- tjestenina,
- margarin,
- sve vrste svježeg mesa, ribe i njihove prerađevine,
- voće i povrće,
- mesne konzerve,
- riblje konzerve,
- voda za piće,
- jestivo ulje,
- hrana za dojenčad,
- dijetetski proizvodi,
- pelene za jednokratnu upotrebu za djecu i odrasle,
- higijenski ulošci,
- deterdžent za veš,
- deterdžent za suđe,
- sapun,
- sredstva za dezinfekciju vode, prostora i ruku (uključujući koncentrirani alkohol),
- toaletni papir,
- pasta za zube,
- zaštitni kombinezoni i druga zaštitna i medicinska odjeća i obuća,
- zaštitne naočale i viziri, zaštitne rukavice, zaštitne navlake za cipele,
- zaštitne maske-hirurške,
- zaštitne maske za lice FFP2 i FFP3 i
- posteljno i ostalo rublje za zdravstveni sistem.